

როგორ უნდა შეძლოს ადამიანმა ქორწინების დროს არჩევანის გაკეთება?



გვესაუბრება ჯვართამაღლების ტაძრის მღვდელმსახური იაკობ მუჭირი:

-არჩევანის მიღებაში ყოველთვის ღმერთი აძლიერებს ადამიანს, თორემ ადამიანს როგორც წმინდა მამები ამბობენ, თავი თვისით არაფერი შეუძლია. სიტყვასაც კი ვერ იტყვის თუ არ იქნება მასთან სულიწმინდის მადლი. ოჯახის შექმნა ძალიან მნიშვნელოვანია. ეს ღვთისგან უნდა ხდებოდეს. ღვთის გარეშე, როდესაც ხდება, იმ ადამიანთა მხრიდან ვისაც გონება ქრისტესი არ აქვს, ვისაც ქრისტიანული მსოფლმხედველობა არ აქვს, მას არ აქვს სწორი შეხედულება ქორწინებასთან მიმართებაში. არ იცის რა არის მეუღლეობა, მეორე ნახევრობა. აბსოლუტურად სხვა მოლოდინიც აქვს ქორწინებასთან მიმართებაში. ფიქრობენ, რომ სხვა უნდა

ცხოვრობდეს მისთვის და სხვა აბედნიერებდეს მას. სხვა უნდა იყოს გამღები, თვითონ კი ყოველთვის მიმღები. სინამდვილეში პირიქით არის. ჩვენ უნდა ვიყოთ გამცემი, ეგოცენტრული საწყისების დამთრგუნველნი და სხვისთვის ცხოვრობდეთ. ეს არის თავგანწირვა და ეს არის მეუღლეობა. ამიტომაც ამბობს პავლე მიციქული: “არავინ თავი თვისი მოიძულის, არამედ ზრდი და ჰფუფუნებდ მას”. ასევე უნდა იყოს მეუღლე, ამ შემთხვევაში პავლე მოციქულს, მამაკაცებზე აქვს ყურადღება გამახვილებული, – “ვისაც უყვარს ცოლი თვისი, თავი თვისი უყვარს”. საკუთარ თავთან არის გაიგივებული ცოლის სიყვარული, საკუთარ თავთან არის ცოლზე ზრუნვა გაიგივებული და ვინც ცოლის ჯანმრთელობაზე, ცოლზე ზრუნავს საკუთარ თავზე ზრუნავს. ვინც ცოლზე არ ზრუნავს საკუთარ თავზე არ ზრუნავს. ასევე ძალიან მაღალი ნიმუშია გახსენებული კორინთელთა პირველ ეპისტოლეში, როდესაც საუბრობს, როგორც ეკლესიის თავი არის ქრისტე, ასევე ოჯახის თავი და ცოლის თავი არის ქმარი. ამ ქრისტოცენტრულ აზროვნებას როცა არის მოკლებული ადამიანი, მერე უკვე ბევრი პრობლემა იჩენს თავს. ოჯახის შექმნის მოთხოვნა ყოველთვის სწორია. ეს ბუნებრივი მდგომარეობაა. ვინ არის ადამისთვის ევა? შემწე მისი შესაფერისი. ებრაულ დედანში არის ძალიან საინტერესო სიტყვები ნახსენები და ქართულშიც კარგად არის ნათარგმნი, ადამი არის არა მარტო მეორე ადამიანის მაძიებელი, არამედ გამიჯნურებული, შეყვარებული ადამიანი. როდესაც ხედავს ევას მას პირველი სამიჯნურო, საარშიყო სიტყვები აღმოხდება გულიდან ევასთან მიმართებაში და ამბობს: “ის კი ნამდვილად ძვალთაგანი და ხორცი ხორცთაგანი, დედაკაცი ენოდოს მას”. ანუ შეყვარებული ადამიანის პოზიციიდან ლაპარაკობს ადამი და არა უბრალოდ იმის გამო, რომ მას შემწე შესაფერი არ ყავს. ყველა ამ გრძნობას და ამ ნაბიჯს წინ უნდა უძღვოდეს სიყვარული. სიყვარულით უნდა იყოს განპირობებული. რაც შეეხება შიშს და სურვილს, რომ ადამიანი უნდა იყოს დაოჯახებული რა თქმა უდნა უნდა ჯანსაღი სურვილია. მოტივაცია არის მნიშვნელოვანი, მხოლოდ შვილიერება არ არის ქორწინების და ოჯახის მიზანი. სამოძღვრო ღვთისმეტყველებაში მკაფიოდ არის ხაზგასმული, თუკი გარკვეული ანატომიური და ჯანმრთელობის პრობლემა აქვს ან ერთს ან მეორეს წყვილთაგან და ეს მოძღვრისთვის ცნობილია, მაინც იწერენ ჯვარს და დგება ოჯახი. ეს კიდევ ერთხელ ხაზს უსვამს იმას, რომ შვილიერება მხოლოდ არ არის ქორწინება და მხოლოდ შვილიერებაზე აქცენტირებული.

-მნიშვნელოვანია თუ არა ასაკობრივ სხვაობაზე ყურადღების გამახვილება?

-ასაკობრივი სხვაობაც არის პირადად ჩემსა და ჩემს მეუღლეს შორის. ჩემი მეუღლე რამენიმე წლით არის ასაკით უფროსი. ყურადღებას როდესაც ამახვილებენ ასაკზე, ეს უკვე მეორე და მესამე ხარისხოვანია და სულიერად არაჯანსაღი მდგომარეობაა. მეუღლეებს შორის სულიერი მიზანი ქრისტე უნდა იყოს. ზოგი ფიქრობს, მხოლოდ სულიერი სიმპათია უნდა იყოს, ვიდრე ხორციელი. ვერავინ იტყვის ამას, რადან ქორწინების დროს ანთროპოლოგიის უგულვებელყოფა არ შეიძლება. ღმერთმა მოგვცა სხეული ანუ ანატომიური ნაწილი, ფსიქოსომატური ნაწილი და უკვდავი სული. ყველაფრის გათვალისწინებით უნდა მოხდეს ქორწინება. უპირველეს ყოვლისა უნდა

იყოს სულიერი ერთობა. ქრისტესში ყველაფერი ერთიანდება და ბალანსდება. ყველაფრის გათვალისწინებით უნდა ითხოვოს ადამიანმა დაოჯახება. კარგია თუ ყოვლადწმინდა ღვთისმშობელის ხატთან მივალთ, როგორც დედასთან და ამ დროს ვითხოვთ შემწეობას. დაუშვათ, ვინმე ადამიანი არის ჩვენს გულთან ახლოს, შეიძლება ეს არ არის ჯერ სიყვარული, მაგრამ სიმპათია არის მისდამი და სურვილი გვაქვს ის იყოს ჩვენი მეორე ნახევარი, მივიღეთ ყოვლადწმინდა ღვთისმშობელთან და ვითხოვთ როგორც დედას ევედროს მის ძეს და ჩვენს ღმერთს, მეოხ გვეყოს ჩვენს წინაშე მისსა, რომ თუ ჩვენი სულებისთვის ანუ ჩემი და იმ ადამიანის სულისთვის სათნოა ჩვენი შეუღლება, აკურთხოს. ეს არის ძალიან მნიშვნელოვანი და რატომ? თუკი ჩვენი ურთიერთობა არ შედგება ვიცით, რომ ეს ღვთისგან იქნება გარკვეულწილად ნაკარნახევი. ღმერთი როდესაც არ გვაკურთხებს გული არ დაგვწყდება. თუ გვაკურთხა ვიცით, რომ ღვთისგან არის და თუ არ გვაკურთხა ე.ი. არ არის ღვთისგან.

სტატიის ავტორი: თეა ცაგურიშვილი

<http://karibche.ambebi.ge/gristianuli-ckhovreba/interviu-modzghvarthan/8222-rogor-unda-shedzlos-adamianma-qortsinebis-dros-archevanis-gaketheba.html>